

IRA JORAS ISANGUENAQUINERI IRAPIGUEMISANTANE

Ibetsataigari.

¹¿Ainirobiegui? Inintasanotaiguimi Tosorintsi. Naro Joras ireinti Santiago aisati iromeraro Jesoquisisito. Nasanguenataiguëmi obironta icoigaiquë Tosorintsi icábintsaiguëmi Jesoquisisito. ²Nocogui ingantaneintë gotasantaiguëmi Tosorintsi aisati intimacagasanotaiguëmi caninasati aisati iromagoriasëretaquëmi aitosati nocogui pigótasantiri inintasanoiguëmi-ninta.

Pigamemari matobiantatsiri.

(II Peroro 2.1-19)

³Nanintane, nocogabeta nasanguenataiguëmime nongomantocoquerome cara yogabisaicotaigacái Jesoquisisito. Carari yamai igáquina Tosorintsi nasanguenataiguëmi iroronta caninataque pisintsitaiganaquero ora icomantëgotëri Jesoquisisito comantantatsiri jirai. Teni ine basini nibarintsisonori. ⁴Aroquenta yaretaigapa matobiantatsiri. Icantomemegaparo caninari arota irianicaninatiri matsiguënga carari irianti matobiantatsiri. Ainta isanguenatococa jirai irirojegui matobiantatsiri iriátë Sharincabenuë. Iroontita icábintsaigacái Tosorintsi iriroque përosati icantaguetasanti ora pairorapagueraca ora te onganinate.

Icanque: “Inintasantái Tosorintsi. Quero icasitígatái”. Aisati itsoiguëgotari Atingomi Jesoquisisito paniro Iriro yasintái.

⁵Aroque pigóiguë jirai yomisotocajiri Tosorintsi ira matsiguënga jitacha Isirael cara Ejíptoquë. Yamai naninti nanguëcagaiguëmiro cara yogamagaiguëri Tosorintsi antagaisati ira te inguemisantiri. ⁶Aisati pigóiguë ira ironomirepague Tosorintsi jirai ijocaiganaquero cara itimaigabitaro jonoganta, aro yomingaiguëri Tosorintsi cara tsitiniriquë përosati irooti cara iragáiguëri Tosorintsi Sharincabenuë. ⁷Aisati Soromasati Gomorasati aisati ira timatsi basinipaguequë poeboro aisa icanta ibega ironomire cantagueantatsiri icantaguetasanti jirai icogaiquë irante basiniati. Irirojegui përosati yamai itsipiriantetiro pamari ora tera otsibacanete. Yamaicari agamaiguëma.

⁸Carari aroque igótabecaro oca iriati ira matobiantatsiri iquengasantaca aisa icantaguetiro përosati ora pairoraca inintaigui te onganinate. Teni inguemisantiri itingomipague. Aisati icantocotaguetasitari antagaisati ira caninari timatsi Jonogaguëtequë. ⁹Irari Miguel itingomi ironomireegui Tosorintsi irisaanganetsite teni irisintsitsatiri camagarisonori cara inibatobaca. Inibatobagobicari igamaga Moisés. Ira camagari inintabecari

Moisés, carari Miguel ininque iráganëri jonoquë. Caraanti icanqueri Miguel: “Irisintsatsatimita Natingomi”.¹⁰ Carari ira matobiantatsiri inibatëgotaguetasitaro ora te irogóiguero. Teni iraninte irogótiro ora iquianca Tosorintsi. Aisati icantaigari otsiti te inguenguema. Iroro ora yamasiantaigaca, aisati ipoguiriantaigaca.¹¹ Iratsipiriaiguë aroquenta icantaigari ibega Caín cara icanquero ora ijique caninaro, teni ingantiro ora icanti Tosorintsi. Aisatinta icantaigari ibega Baram ira matobitajacha ijocanëri Tosorintsi icogabetaninta irágueme tojai quirequi. Aitosati iratsipiriaiguë aroquenta icantaigari ibega Coré ira teni inguemisantatsitiri Moisés itingomi, inibatëgotaguetasitari, aro yogamaguëri Tosorintsi.

¹²Irianti aguimingatapëro jiesita cara papatoita obirojegui quemisantatsiri, cara papaigui aroquenta piquengaiguëri Tosorintsi aisa pinintobaca. Teni iripasiguitaigue iriro. Yapasantaiguë iquemaca yógaigaca, patiro iquengaigaca iriati. Iancaro mingori otsitinitabeca páganairo coguentima teni obariguero angani. Aisati icancaro anchato cara omoncaratabeta cara otimi oguitso carari quero otimi. Aisa icancaro anchato osiabonguititaga ora te ine oguitso. Icamasantaiganaque.¹³ Ira matobiantatsi icancaro angaare cara posebaata picontetanë osimare. Aisa yosigaro cara picontetanë ora icantagueti pasiguitagantsi. Irirorjegui icancari jonogasati ira quenasantague-tacha. Tosorintsi icantocoqueri matobiantatsiri icanque: “Iriáiguë tsitiniriquë agabenisonori canta përosa otsitiniti”.

¹⁴Cara jirai ibantanë Arán inanë. Aique icharinentanaca icarati 7. Ira carantatsi jitacha Enoc comantantatsiri. Icomantëgotaguëri ira te inguemisante:

“iPinetse! Iribocapë Atingomisonori intsibatapëmari tojaisonori ironomireegui irisaanganetsite caninari.¹⁵ Cara iribocapë ingomantëgotasanoi-guëri omagaro. Irotopitacaqueri ira matobiantatsiri ingomantëgotaguequero antagaisati ora icantaguetasanti te onganinate. Aisati ingomantagueque omagaro ora inibatëgotasitacari Atingomi”.¹⁶ Yabentaigaca matobiantatsiri. Aisa icantocotaguetasitari matsiguenga. Patiro icogaigui ora ininti ingante iriatiegui. Iquengasantaiganaca iriantiegui caninari. Inibanibatasanoi-guë yomitojaiguëro irinibare ijitacaqueri basini matsiguenga caninari iriro. Inibatëgotasitomemegacari caninasati basini matsiguenga, iroontinta icogaigui ingábintsëma iriati.

Ora icocacái Tosorintsi.

¹⁷Carari, nanintaneegui, pinguengai-gairo ora icomantaigái jirai iragátane Jesoquisito Atingomi.¹⁸ Icomantaiguë: “Cara aiquenta iribocagapë matsiguenga iricobíntsátapëro ora caninaro aisati ingantaguetagapë ora icogui ingante ora te onganinate”.¹⁹ Irirorjegui casiriconiatitaigapërine ira quemisantiri Tosorintsi. Patiro iquengaiguëro ora te ongomeite tenta inantimari Isère Tosorintsi.²⁰ Carari, nanintaneegui, nocogui pisintsitantanë maro Irinibare Tosorintsi aroquenta piquemisantasantotëro. Aisati nocogui omitocotaiguemi Isère Caninaro Tosorintsi cara pomanagerinica.²¹ Pijátsatanëri Tosorintsi arota pigóiguë cara inintasantaiguimi. Përosati pinguengeri, pigueiri Ira Atingomi Jesoquisito irooti cara iribocapae ingantaneintëgotagapëmi irágaigana-quemi Jonogaguetequë cara pintiomopëri përosati.²² Aintaca matiguenga pënibaque inguemisanque,

pomitocotaigueri inguemisantirita
 Tosorintsi. ²³Pinguemisantacaguiri
 basinipague arota iragabisaicotajiri
 Jesoquirisito. Pigabisaicotiri arota quero
 iáti Sharincabeniquè cara pini pamari
 tsitsi. Pingantaneintègotalgueri
 basinipague carari pigamema
 obirojegui, pintsorogague quero
 poguiatiri arota quero icantacaguimiro
 ora quimingari.

²⁴⁻²⁵Ainta paniro Tosorintsonori
 Agabisaicoontatsiri. Isintsitagaiguèmi

arota quero picantagueigui ora te
 onganinate. Irágaiganaquemi
 iraguètetaigabaquemi pintegotsitaigapè
 Iriroquè pinganinasèretomotaigapèri.
 Aroquenta icábintsancáiri Jesoquirisito
 Itomi Tosorintsi intsome angantocotiri:
 “Itasorintsitanoti, icaninatanoti,
 icobeingatanoti, yasintaguitetasantaro
 antagaisati. Iriro Itingomisonoriguinte.
 Jiraisonori itimi, aisa yamai, aisa
 pèrosati itimi”.

Yamai aro ocarati. *Joras*